

BOTEE BJA KOPANO

 Re thabile go ba le monyetla wa go tla ka Bogoneng bja
Gago le go kopana le Wena. Gomme, O Modimo, anke re be
le kopanelo bosegong bjo go dikologa Lentšu le le ngwadilwego.
Anke Moya wo Mokgethwa o šušumetše tšohle tše di dirilwego
goba di boletšwego. Bakeng sa letago la Modimo re a e kgopela,
ka go la Jesu Leina. Amene.

Le ka dula.

² Ba nyakile go ntshwara ke sa itebetše. Ke be ke lebeletše fase
mo go ngwanešu yo monnyane wa Arkansas go tšwa tlasetlase
ka go naga ye kgolo yela ya Arkansas. Gomme o ya go dira eng
godimo mo ka go naga ye ya go tonya go le bjalo?

³ Gabotse, mogohle ke yago, ke kopane le batho go tšwa
Arkansas. E bile le lengwe la mafelo a ka a mathomo go ya go ona
ka morago ga ge ke tlogile St. Louis, moo re bego re le ka Keil
Otitoriamo, le go ya tlase ka Arkansas. Gomme ga ke tsoge ka
lebala batho bale, ka mo ba tlago. Oo, feela, go be go le batho ba
dikete tše masomepedi seswai; kuranta e boletše, ka Jonesboro.
Gomme toropokgolo ke e ka ba seswai goba dikete tše lesome,
ke a thanka, setšhaba. Sebaka sa dimaele tše masometharo go
dikologa toropokgolo, go be go se selo; dintlo tšohle tša polasa
do tšerwe, le ditente di agilwe le dilo, gomme batho ba dula ka
go yona, ka fase ga tša kgale—kgale ditheraka. Gomme batho, e
ena . . . E be e tla na, batho ba swere dintsekana tše nnyane tše
seila le dikuranta godimo ga magagabobona a go babja, ba nno
ba letela gore ba rapelelwe. E be e sa dire phapano ye e itšego ge
ba tsene beke ye goba beke ya go latela. Neng kapa neng e bego
e le, go be go lokile. Le a bona?

⁴ Gomme ke elelwa tlase ka Corning. O dula kgauswi le kua,
a o a? Corning. O bonala . . . Ke bone se sengwe kua seo ke
thankago gore mohlomongwe Dwight Moody, goba Sankey, goba
ba bangwe ba bao ba se bone ka matšatšing a bona.

⁵ Ke be ke le ntle ka lešokeng, ke be ke gogetše morago gomme
ke be ke le morago kua ke rapela, ke nnoši, pele ga tirelo. Ke be
ke bona batho ba etla ntle go ditsela tšela tša lerole, ba eya tlase
tirelong, go bapa ka morago ga sekgalela. Gomme ke hlokometše
bahumagadi ba baswa, bahumagadi ba baswa ba babotse, e sego
ka godimo ga lesometshela, lesomeseswai bogolo, ba phathekigile
dieta tša bona le makouse ka fase ga letsogo la bona. Pele ba ka
fihla kua, ba be ba dula fase, ba phumula maoto a bona, gomme
ba rwala melentse le dieta tša bona. Ba be ba ne para e tee feela,
gomme e be e swanetše go swarelela. Eupša ka kgontha ba be ba
rata Morena.

⁶ Ye mengwe ya mehlolo ya go ikgetha kudu nkilego ka e bona e dirwa ka Amerika e dirilwe kua. Gomme ke nyaka go tla morago Arkansas, le lengwe la matšatši a, go no ba le ya kgonthe ya kgale nako ya kopanelo go dikologa Lentšu le batho ba Modimo.

⁷ Bjale, re no ba ka pela gannyane, bošegong bjo, gomme kafao re ya go bala le lengwe la Lentšu la Modimo la Gosafelego, bjalo ka mehleng. Gomme ke nyaka go . . .

⁸ Go bolela, ke a dumela ba boletše, mo, re bile le . . . O šetše o tsebišitše difihlolo tšela tša bodiredi, le go ya pele? [Yo mongwe o re, "Ya."—Mor.] Ya. Gabotse. Go lokile, gona.

⁹ Re nyaka go bala bošegong bjo go tšwa go Puku ya Genesi. Gomme ke le nyaka le theetše ge re bala go tšwa go tema ya 11 le temana ya 5.

Gomme MORENA o tlide fase go bona toropokgolo le tora, ye bana ba batho ba e agilego.

Gomme MORENA a re, Bona, batho ke batee, . . .

¹⁰ Ke nyaka go bolela, bošegong, ka *Botee Bja Kopano*, bjale, ge re eya thwi ka Lentšung, bakeng sa tlhohleletšo ye. Gomme bjale ke . . . Go makatša kudu, go nagana gore, gore se batho ba se bonego mo e be e le se tee.

¹¹ Gomme, le a tseba, yeo ke polane ya Modimo, Modimo o nyaka batho go ba batee. Gomme go a makatša go nagana, eupša diabolo o leka go bea polane ya gagwe go ba gona le go dira batho batee ka fase ga polane ya gagwe. Bjale, Modimo a ne polane, gomme diabolo o ne polane. Gomme ka gona diabolo o leka go bea batho ka fase ga polane ya gagwe, mola Modimo a leka go dira batho go ba batee ka tlase ga polane ya Gagwe.

¹² Kafao go ne meboya ye mebedi ye megolo ka lefaseng, wo motee wa yona ke diabolo, wo mongwe ke Modimo. Diabolo o ne batseta, Modimo o ne batseta, gomme re lokologile go dira kgetho ya rena. Yo re tla ineelago go yena renabeng, ke yoo re lego bahlanka ba gagwe. Eupša ge o hlokomela ge . . .

¹³ Ke be ke rera Lamorena la go feta ka lenyora le le lego ka go batho, motho. Modimo o dirile motho go nyorwa, eupša go nyorelwya Yena. Ke ka baka leo lenyora le beilwego ka mothong.

¹⁴ Eupša diabolo o tla go bapa gomme a fapoša leo, gomme a dira batho go nyorelwya yena, le dilo tša lefase. Beibele e rile, "Ge o rata lefase goba dilo tša lefase, lerato la Tate ga le ka go wena." Ka gona, le a bona, diabolo o a fapoša. Ga a kgone go hlola e ka ba eng, eupša o kgona go fapoša se Modimo a šetšego a se hlotše. Diabolo ga se mohlodi. O no ba mofapoši wa tlholo ya setlogo. Gomme sebe ke eng? Ke tokو yeo e fapošitšwego.

Ke ba bakae ba kwešišago seo? Le a bona? Gabotse. Ke no makala.

¹⁵ Ke nna Motšwaborwa, gomme re nno tlwaela karabelo ye go fetiša gannyane go feta yeo. Gomme ba—ba batho ba Leboa ke baganadiphetogo. Gomme—gomme ke bile ka Borwa botelele kudu go fihla o no swanela go tlwaela ditsela tša Borwa, goba nna ditsela tša lena tša Yankee.

¹⁶ Eupša ke le nyaka le tsebe, re fentše ntwa. Ya. Ga re ne phegišano ka seo. Go ne Motšwaborwa o tee a phelago, gomme ga go Mayankee, kafao re fentše ntwa. Ke naganne e be e ratha kudu ge Moyankee yo monnyane yola a be a ehwa, go le bjalo, gomme Motšwaborwa o mo rometše thelekramo gomme o rile, “Modimo a go šegofatše, Moyankee. Ke holofela go go bona gape, gabotse ka pejana.” Gore, gobaneng ba be ba sa kgone go nagana ka seo mathomong, le a bona, le go e lesa ya ya? Eupša ke rata go bolela gore, gore go ne feelsa . . . Go tsere matsapa a bophelo go thopa ntwa, eupša mafelelong re e hweditše. Le a bona? Go lokile. Eupša go ne nako ye kgolo e e tla.

¹⁷ Gomme bjale go boleleng ka le—le lenaba, kafao gore o fapoša toko go se be go loka. Bjale, gore, re lešaba la go hlakana, bobedi banna le basadi, bontši ba bagolo bohole, kafao ke ne nnete le tla kwešiša. Le theetšeng ngaka ya lena, gomme ke nna ngwanabolena. Ke semolao, le molaong, le bomodimo, go monna go itšeela mosadimogatša yenamong, le go phela le mosadimogatša yo. Eupša mosadi yo mongwe a ka kgona go ba selo sa go swana go yena, eupša e tla ba lehu go mo kgwatha. Go ne phapano, toko e fapošitšwe. Ke tsela ye sebe sohle se lego, ke toko e fapošitšwe.

¹⁸ Modimo o go dirile go Mo nyorelwā, gomme Modimo o dirile Kereke go ba botee ka fase ga mmušo wa Gagwe. Eupša yo mobe o ba dira botee ka tlase ga mmuša wa gagwe.

¹⁹ Bjale ge le ka hlokomela ka go bodumedi bja Mohammedan, tše dingwe tša dilo, ge re ka no kgona go tšeа nako. Dilo tše di lego, ka fao di fapošitšwego! Ka go bodumedi bja Mohammedan, mo ke bilego le monyeta wa go etela naga kgauswi le lebitla la Mohammed, gomme lebitleng la gagwe go bile pere ye tšhweu e bego e eme mola lebaka la mengwaga ye dikete tše pedi. Diiri tše dingwe le tše dingwe tše nne, ke a nagana ke yona, ba fetola mohlapetši, gomme pere ye tšhweu, e beilwe sala, gomme e letetše go tsoga ga Mohammed. Gomme ba re o tla tsoga go tšwa bahung, a namela godimo ga pere, gomme a fenya lefase.

²⁰ Ka gona, le a bona, ba šeditše mofenyi go tla, a nametše pere ye tšhweu, gomme ka fao se fapošitšwe go tšwa Mangwalong. Gobane, “Jesu o etla, a nametše pere ye tšhweu, seaparo sa Gagwe se inetšwe ka mading; Leina la Gagwe, Lentšu la Modimo.” Eupša, le a bona, diabolo o tsere teori yeo gomme a e fapošetša go Mohammed. Eupša, ka therešo, Jesu o tla tla godimo ga pere ye tšhweu. Beibele e boletše gore O tla dira.

²¹ Gomme o ka no tliša ka gare tumelothoko e ka ba efe o nyakago gomme o bona dika tše ntši tša Bokriste bja therešo.

²² Bjale, ka go tora ya Babilonia, ge o ka hlokomela tora yela, e be e le mathomo a Babilonia; ye ke tla bolelago ka yona moragonyana beke ye, Morena ge a rata. Babilonia, yona toropokgolo, e be e phethennwe go tšwa go Legodimo. Gomme ka kua ba be ba ne noka ya Forate e ela thwi thoko ya terone le serapa, serapa sa go kgelempua. Gomme e phethennwe go tšwa go Legodimo, gobane Noka ya Bophelo, Tero- . . . e ela kgauswi le Terone ya Modimo. Gomme o bona phihlelelo ye motho a e dirilego, e be e le go dira phethene, phapošo.

²³ Gomme ka gona, ka go selo se segolo se, ba bile le monna ka leina la Nimirode. Gomme Nimirode o be a tliša ditoropokgolo tšohle ka moka le ditšhaba ka tlase ga pušo e tee ye kgolo, go laetša gore ke teori ya madirwakemotho, e no ba phethene.

²⁴ Eupša Kereke ya Modimo e kopane ka tlase ga Modimo. Motho ga a ne go dira selo le Yona. E kopane ka tlase ga Modimo.

²⁵ Gomme Babilonia ye, e begoe e le mathomo a . . . Ka go tlholo, ka go Genesi, re a hwetša gore e mošola ka go Kutollo, gomme e bolela ka lefase la yona la bokereke ka matšatšing a mafelelo, e lego bjale, mafelelong e tla kopana ka tlase ga molwalekriste, bodumedi bja madirwakemotho.

²⁶ Eupša ke a leboga go bolela gore Kereke ya Modimo e tla kopana, le yona, ka tlase ga Hlogo, Modimo.

²⁷ Eupša mabodumedi a madirwakemotho ohle a tla tla ka go bodumedi bjo bja molwalekriste. Go tla ba dibopego tše pedi tša ona. Sebopego se tee se tla tšwa Roma, se e tla bago sebata. Gomme go ne seswantšho sa sebata, e tla bago hlogo ya bokereke ya kereke ya Protestant, e pakelana godimo bjalo ka seswantšho sa sebata, ka tlase ga lefase la kerekeleina. Gomme yohle e tla tla ka tlase ga taolo e tee ye kgolo, gomme molwalekriste e tla ba yena a bewago teroneng le go bewa setulong. *Molwa*, “kgahlanong,” di nyakile go swana tlwa, eupša efela ya gagwe—ya gagwe—ya gagwe thuto ga e tšwe Mangwalong. Mangwalo a go lekanela go dira e lebege o ka re ke nnete, eupša e tla fošagala.

²⁸ Gomme ke a tseba le—le re, “Ngwanešu Branham, o šupa Roma bjale.” Yeo ke tlwa. Gomme e sego Roma feela, eupša Boprottestant, le bjona. Tlwa. Beibele e boletše bjalo.

²⁹ Eupša ke lena bao, diabolo o kopanya batho ka tlase ga hlogo e tee, hlogo e tee ya bokereke, motho lefaseng. Beibele e rile, “O tla dula ka tempeleng ya Modimo, a laetša gore ke yena Modimo.” Gomme le ka mo a tla aparago mphaphahlogotharo, le dilo tšohle tše a tla di dirago, “Moemalegato wa—wa legodimo, lefase, le phekatori.” Gomme ka tlase ga ye go tla ba se—se seswantšho go yena, moo bohle ka moka ga bona ba tla kopanago mmogo.

³⁰ Eupša Kereke ya Modimo wa go phela e tla kopana ka tlase ga maatla a Modimo le tlhokomelo ya Moya wo Mokgethwa. Kereke ya Modimo e tla kopana. Oo, a ga la thaba?

³¹ Ka go iri ye ya leswiswi, ge se sengwe le se sengwe se tswalela, batho ga ba hlokomele. Ga ba dire. Go bonala o ka re dipelo tša bona di ya kgojana le kgojana go tloga go Modimo. Lefase le ba tonyitonyi le tonyitonyi, le go hloka tirisano, gobane dihlogo tše kgolo tše tša bokereke di a bopega.

³² Ka Russia, Russia e leka go kopanya lefase ka tlase ga bokomonisi, Russia. Diabolo yo a laolago Russia o leka go kopanya lefase lohle ka tlase ga bokomonisi. Ba ka se tsoge ba kgonne go e dira.

³³ Gomme ka gona U.N., Ditšhaba Kopano, di leka go ba kopanya ka tlase ga maatla a mokgatlo wa sephodisa, tshepedišo ye nngwe ya madirwakemotho. E ka se tsoge ya šoma. E ka se kgone. Eupša bohole ba leka go.

³⁴ Gomme anke ke bolele se ka ditlhompho, eupša go ya ka Lentšu la Modimo, gore setšhaba se sengwe le se sengwe lehono se laolwe ke diabolo. Beibele e boletše bjalo. Sathane o laeditše Morena wa rena mebušo ya lefase, gomme o rile, “Yohle ye ke ya ka, go dira ka yona e ka ba eng ke nyakago go e dira. Gomme ge O ka nthapela, ke tla e neela yohle go Wena.”

³⁵ Gomme Jesu o tsebile gore O be a eya go ba mojabohwa go yona ka Mileniamo, kafao O rile, “Tloga morago ga Ka, Sathane.”

³⁶ Ge lefase le be le bušwa ke Kriste, re be re tla kgobela dibetša gomme go be go ka se tsoge gwa ba kolo ye nngwe e thuntšwego. Re be re ka se be le mohola e ka ba ofe wa disputiniki le wa dipomo tša haetrotšene, go thuthupiša batho. Ge Kriste a tšeaa taolo go pušo ya lefase le, bjalo ka “Kgoši ya magoši le Morena wa marena,” batho ba tla kopana go Yena, ka tlase ga pušo tona e tee ye kgolo. E tla ba nako!

³⁷ Ditšhaba tšohle di nyaka batho go ba batee. Jeremane e naganne bohole ba tlamega go ba Majeremane. Russia e naganne bohole ba tlamega go ba Marussia. Lefase la Bodikela le nagana bohole ba tlamega go tla mo. Gomme ba ba nyaka ba bolele leleme le tee, go no swana le ge ba dirile ka Babilonia. Modimo o rile, “Ke bona leleme le tee.” Gomme o ba nyaka ba bolele leleme le tee. Ba ba nyaka bohole ba be batho batee ba kopanego, eupša e ka se tsoge ya direga ka tlase ga pušo ya motho.

³⁸ Eupša ke tla bolela se, gore go tla nako mo ditšhaba tšohle di tla kopanago mmogo ka tlase ga Kgoši e tee, gomme yo e tla ba Jesu Kriste, Morwa wa Modimo. Gomme ba tla bolela leleme le tee. Ba tla ba batee ka pelo e tee le morero o tee. Daniele o bone bofelo, ge Letlapa le kgomogile thabeng, ntle le diatla, gomme Le tokologetše ka go mebušo ya lefase le go e šilaganya, gomme e bile bjalo ka mooko seboweng, legapi leo phefo e le phepheulago.

Eupša Letlapa le akareditše lefase lohle. Letlapa leo ke Kriste. Go tla ba le nako tsoko go tla ba setšaba se tee, batho ba tee, folaga e tee: sefapano sa kgale sa makgwakgwa. Tumišo e be go Modimo wa go phela!

Dikholofelo tša ka ga tša agwa go selo ntile le
Go feta Madi a Jesu le toko;
Ge tšohle go ntikologa di šutha,
Gona Yena ke kholofelo ya ka go dula.

Gobane go Kriste, Leswika la go kgwahla, ke a
ema;
Mafelo ohle a mangwe ke kwenamohlaba.

³⁹ Mafelo a mangwe ohle, dikereke, dikerekemaina, ditšhaba, diU.N., eng kapa eng e ka bago, yohle ke kwenamohlaba, e swanetše go tla bofelong.

⁴⁰ Ke bile le monyetla wa go ema ka Roma, mo Kesare yo mogolo yo a lekilego go kopanya lefase lohle ka tlase ga mmušo wa Roma. Gomme, lehono, o swanetše go epa dikgato tše masomepedi fase, go hwetša marope a toropokgolo yela.

⁴¹ Ke eme ka Egepeta, moo bofarao ba bagolo ba lekilego go kopanya lefase ka tlase ga Egepeta, gomme o epa dikgato tše masometharo, go hwetša marope a toropokgolo. “Gobane mo ga re ne toropokgolo ye e tšwelagopele,” go bolela Beibele, “eupša re nyaka e Tee e tlago.”

⁴² E sego telele go fetile, ge nako ye nngwe ke ile ntile ge ke be ke sa le mošemanne. Ke bone mohlare, wo ke bego ke tlwaetshe go ya go dula ka fase ga mohlare wola. Gomme ke rile, “Ge ke le mokgalabje, ke tla tla morago le go dula ka fase ga mohlare wo o itsegoo, gomme ke tla lebelela godimo ka makaleng. Ke tla thabela botse bja wona, bjalo ka ge ke le lehono, bja mošemanne wa lesomepedi.” Ga go selo se šetšego sa mohlare wola eupša keketane. Gobaneng? Ga go selo mo se se tla tšwelagopele. Se swanetše go goma.

⁴³ Se sengwe le se sengwe se hwago se bolela ka se Setee sa go se hwe se tlago, gobane se sengwe le se sengwe re se bonago ke tiro ye e fapošitšwego ya se sengwe e lego sa kgonthe.

⁴⁴ Ke nyadištše banyalani, gomme ke bone mosetsana yo moswa wa go ratega ka go mahlalagadi a go khukhuša a gagwe, lesogana ka magetla a gagwe morago, ba eme bjalo ka ge ba be ba le, batee, gomme dipelo tša bona di rethetha mmogo. Ke a nagana, “A ga se seswantšho se sebotse go tsoge sa senywa ke lehu?” Eupša e no ba mengwaga e se mekae go fihla moriri o fetoga wo mopududu, le magetla a kobama, gomme ba ya morago leroleng. Ke eng? Ke seswantšho, ge ba eme fale, gore go ne Naga mošwa Noka, moo sekwa se sengwe le se sengwe sa lehu se tlošwago. Fao, gosehwe, go tla ema ka go swaneng le Yena, go phadima go phala letšatši le dinaledi.

⁴⁵ Mphatlalatšane ye kgolo yela ga se ya lahlegelwa ke e ka ba bofe bja botse bja yona ge e sa le Morena a e budula go tšwa diatleng tša Gagwe le go e lekeletša ka opiting ya yona, gomme lebelelang se mengwaga e sego mekae e se dirago go rena. Eupša O bolela eng ka Lengwalong? O rile, “Bao ba retolletšego ba bantši go ya tokong ba tla phadima go phala dinaledi.” “Kafao re lebelela Toropokgolo Yeo Moagi le Modiri wa Yona e lego Modimo.”

⁴⁶ Morago ga ge le bona selo se segolo se seo ke lekago go agela monagano wa lena ka go sona, bakeng sa kgwekgwe, ke leka go le dira le bone ntle mo gore go ne mo—mo mošomo wa lenaba. Gomme mošomo wa lenaba, ka moya wa phapogo, o leka go dira se Moya wa Kriste o lekago go se dira. Lenaba le a leka, boka pele le morago, go kopanya lefase lohle ka fase ga hlogo e tee ye kgolo. Lefase le dira seo; Russia, U.N. Gomme bjale anke ke ye kgojana gannyane. Gomme kereke e leka go e dira, ka fase ga peakanyo ya madirwakemotho. E ka se tsoge ya šoma. Ga se lenaneo la Modimo. Nka kgona go netefatša yeo ka Lentšu la Gagwe.

⁴⁷ Eupša, le a tseba, Modimo o go dirile motho, go go dira o hlologele go ba ka tsela yeo, gore A kgone go go tlatša ka go loka ga Gagwe. Bjale, ge . . . Motho o swanetše gore a tlale ka se sengwe. Yeo ke nnete.

⁴⁸ Ye ke nako ya go kgetha. O ka se kgone go ema magaranakeng botelele bjo bo itšego. O ka no tloga pele molaetša o fela, eupša o ka se tšwele ka ntle ga mojako wola o le motho wa go swana le ge o tsena. Yeo ke nnete. O tla tshela mollwane wola, bošegong bjo, e ba gore o le motho yo mokaone goba mo—mo motho yo mobe go feta o bego o le ge o be o tsena. O ka se kgone go e thuša. Go tšwa go wena go tšea sephetho. Bjale, hlokamelang, ke nako ya go kgetha. O ka se be magaranakeng. Ke nako ya go kgetha. “O swanetše go kgetha letšatši le yo o yago go mo direla.” Gomme diabolo o hlagišitše dilo tše ntši, tša matsaka, tše o ka kgonago go kgetha ge o nyaka. O ka se kgone go dula o le ka tsela ye o lego. Gobane, o swanetše go ba . . . ge o se ne selo.

⁴⁹ Bjale, ke duma se go dula magareng ga lena. Gomme Morena wa go loka wa Legodimong o tseba gore ga ke bolele se go hloka tirišano. Eupša ke no bolela se go bontšha Therešo. Gomme baebangedi ba rena ba bagolo ba ba lego go kgabaganya lefase lehono . . .

⁵⁰ Gomme e sego telele go fetile, ke bile le monyetla wa go dula fase difihlolong le motsebalegi Billy Graham, yo ke dumelago ke mohlanka wa Modimo, go ya go kgabaganya ditšhaba, go ba biletša go Kriste, go biletša lefase go Kriste le go tshokologo. Gomme ke mo kwele a re, pele ga sehlopha sa bareri, ge a topile Beibele, ka mokgwa *wo*, gomme o rile, “Ye ke mo—mo mohlala.” O rile, “Paulo o ile ka toropongkgolo gomme o dirile mosokologi. O boile morago ngwaga moragonyana gomme o bile le basokologi

ba masometharo.” O rile, “Ke ya ka toropongkgolo gomme ka ba le basokologi ba dikete tše masomepedi. Ke tla morago mo ngwageng gomme ga ke ne masomepedi.” Oo, ke be ke nyaka bjang go bolela se sengwe! Eupša e be e le kopano ya gagwe.

⁵¹ Billy Graham, ka molaetša wa gagwe, o botša batho go sokologa le go tloga sebeng. Gomme woo ke molaetša wo bohlokwa. Gomme Modimo o kgethile Billy Graham go e dira. Ga go yo mongwe gape a ka e dirago boka a dirile, gobane o latela Morena. O ka go moyo wa Johane, wo, pele ga go tla ga Kriste, o ile pele gomme a rera tshokologo gomme a se dire mehlolo, eupša o rerile le go hudua mabodumedi le go ba dira komana bakeng sa molaetša wa go latela.

⁵² Eupša, lehono, bjalo ka ge Billy Graham, ngwanaborena moratwa, bjalo ka ge a dira batho go inyabalatša bonabeng go tswa sebeng, ga a ne molaetša wa go tlatša gape. Bjoo ke bjo e lego bothata: o nyabaladitšwe ntle.

⁵³ Eupša anke ka go kokobela ke bolele le lena, bjalo ka ngwanabolena. Beibele e rile, “Ge moyo wa ditšila o tšwele mothong, o sepela mafelong a go omelela.” Ka mantšu a mangwe, o ya go dikologa, mogohle, o leka go hwetša khutšo. Moya ga se o mobe go fihla o kgona go hwetša yo mongwe o ka kgonago go bolela ka yena goba go phela ka yena.

⁵⁴ Feela kgauswana, ke kgonne go kwa moyo ka kopanong. Gomme lena bohole ba le romelago mangwalo a lena ka gare, bjalo ka go kgopela tshwarelo ya bošego bja mathomo goba a mabedi, go dumela gore e be e le mohuta tsoko wa peakanyo ya monagano, gomme bjale le kgodišegile. Nnete, ke a le lebalela. Modimo, o a dira, le yena. Gomme Morena a le šegofatše. Nnete.

⁵⁵ Bjale, ge kopano e tšwelapele, moyo wo mobe ka kopanong, moyo wo ga o kotsi e nyakile go fihla o ka kgona go swara yo mongwe o ka kgonago go šoma ka yena. Ka gona o ka kgona go šoma go kgabola, ka nnete o tla dira tshenyo, gobane ke moyo wo mobe.

⁵⁶ Gomme Moya wo Mokgethwa o mo, o leka go hwetša yo mongwe go šoma ka yena. Gomme ge O hwetša yo mongwe go šoma ka yena, O ka kgona go dira botse.

⁵⁷ Le bona meboya ye mebedi, maikaelelo a yona, maikemisetso? Šetšang ka mo e lego. Šetšang mešomo ya yona. Šetšang dikenywa tša yona, gona le ka kgona go bona ke moyo ofe o lego godimo ga gago. O tutuetšwa ke moyo. Ge o se ne moyo, o hwile. Gomme ge o ne moyo, o tutuetša bophelo bja gago.

⁵⁸ Gomme ge bophelo bja gago bo enywa kenywa ya Bokriste, ke Moya wa Bokriste. Bjale, o ka no tlatšwa.

⁵⁹ Bjale šetšang moyo wo mobe wo. “Ge a eya ntle, o sepela mafelo a go omelela, o tsoma lefelo go hwetša khutšo.” Beibele e

rile, "Ga o kgone go le hwetša, kafao o re, 'Ke tla boela morago mo ke tšwago gona.'" O ya morago go motho yo o kilego wa ba ka go yena, gomme o hwetša ntlo yohle e swietšwe, e hlatswitšwe, e hlwekišitšwe, kahlolo yohle e ile. Oo, e no ba modumedi wa go thaba ka kgonthe, eupša ga go selo. "Gomme o rile, 'Etlang mo,' meboya ye mengwe ye e šupago ye mebemebe go feta a be a le." A ka kgopelo le ka kgona go hwetša se? Beibele e rile yeo ke Therešo. Jesu o rile ke Therešo. "Gomme o boa morago go ntlo ye."

⁶⁰ Motho yo a ipoletšego Kriste go ba Mophološi, o fedišitše bobe bja gagwe, o tlogetše go nwa ga gagwe, o tlogetše go kgoga ga gagwe, go aketša ga gagwe, go utswa ga gagwe. O hlwekišitšwe, o hlatswitšwe. Ntlo ya gagwe e swietšwe yohle. O ikwa a lokologile. "Kafao o tla morago gomme a hwetša ntlo yela. Ka gona o a ya gomme o tše meboya ye mengwe ye e šupago ye mebemebe go feta a bego a le, gomme o tla ka go motho yo." Gomme Beibele e boletše, gore, "Leemo la mafelelo la motho yoo ke le lebe kudu makga a šupago go feta le bile mathomong."

⁶¹ Bjale go nno direga eng? Moebangedi o tla go kgabola, ba rera tshokologo, gomme o hlwekiša dibe tša gago. Gomme ka gona ge o hlwekišitšwe, diabolo o tloga go wena. O bušetša dilo tša gago morago, tše o di utswitšego. O a ya, o ipolela diphošo tša gago go mosadimogatša wa gago goba monnamogatša wa gago. O hlwekiša ka kgonthe. Gomme ka gona, selo sa ntshe ke, o nno hlweka, gomme o dirile senepša se sebotse ka kgonthe sa diabolo.

⁶² Bjale, "Morago ga ge batho ba dumetša gomme ba kolobetšwa, ba ile ba tlatšwa ka Moya wo Mokgethwa." Gomme leo ke lenanego Kgethwa la Modimo. Bjale, ge o tladišwe ka lefase... Gomme ge o pholoshišwe, o ka no tlatšwa ka dikgopololo tše botse, le go ya pele; eupša ntle le ge o ka tlatšwa ka Modimo! Modimo o rometše Moya wo Mokgethwa, lefaseng, go tutuetša Kereke.

⁶³ Gomme o ka no tlatšwa ka dikgopololo. O ka no tlatšwa ka thutamodimo. Gomme o ka no tlatšwa ka thuto, matsebatšohle. Gomme o ka no tlatšwa ka bodumedi, gomme wa no be o sa le senepša sa diabolo. Yeo ke nnete. Bjale, ge...

⁶⁴ Modimo o go dirile gore o kgone go kgothola. Gobane, ge o be o tswalwa, o dirilwe le lefelo le le swanetšego go tlatšwa. Ka tlhago, o ngwana wa diabolo. Gomme ge o... Moebangedi o tla go bapa, gomme o a sokologa gomme wa hlwekišwa.

⁶⁵ O a bona eng? Diabolo o a tla. O tliša morago go wena, gomme o go bea ka go kerekeleina tsoko ye nnyane, le go re, "Kereke ya rena ke yona ye kgolokgolo." O phosö, thwi fao, go thoma. Ka gona o ba hlogothata, monagano wa godimo. "Gobaneng, ga go ntshole go dula gae le go bogela thelebišene. Ga go ntshole

go kgoga sekerete se sennyane sa segwera goba go nwa gatee ka lebakana.” Dikenywa tša gago di bolela se o lego sona.

⁶⁶ Gomme ka gona o tla kwa banna ba baruti ba emeleta. Gomme o ka no be o bala Beibele, gomme o bona mo Jesu a diragaditšego le go dira mehlolo. O e tšeela go modiša. “Oo,” o tla re, “bjale, lebelela. Rena ga re dumele Leo.” Ke mang “rena”? Ke mang “rena ga re Le dumele”; yena le mang? Ga se yena le Modimo, gobane Modimo o Le ngwadile. Ke yena le yo mongwe gape.

⁶⁷ Gomme ge o ka ya morago ga yona, ke maikaelelo a go swana a bego a le go tora ya Babilonia, go ageng ya madirwakemotho, taolo ya lefase. Eupša Modimo ga a nyake yeo. Ga A le nyake bohole le kopana ka tlase ga Methodist, ka tlase ga Baptist, goba ka tlase ga . . . bokereke e ka ba bofe, hlogo ye kereke. Ga A le nyake lena bohole le kopana ka tlase ga Roma. Ga A nyake lena bohole le kopana ka tlase ga . . . taolo ya kereke e ka ba efe.

⁶⁸ O le nyaka le kopana ka tlase ga Mmušo wa Gagwe wa semoya, Moya wo Mokgethwa. Gomme ge Moya wo Mokgethwa o etla, lefase le a hwa, gomme le tlatšwa ka kolobetšo ya Moya wo Mokgethwa. Gomme diabolo ke motho o swanetše go le katoga. Le ka tlase ga pušo ya Modimo. O sebopiwa se seswa. Moya wo Mokgethwa o tla ka go lefelo lela la go se be le selo le go le tlatša.

⁶⁹ Bjale, modiša, tumelothoko e ka ba efe, sengwalwa tsoko se sennyane se o ka se balago, se ka no re go wena, “Matšatši a mehlolo a fetile.” Leo ke lefelo le lebotse bakeng sa diabolo go ngwegišetša wo mongwe wa meboya ka kua le go go dira o be motho yo mobe go feta o bego o le ge o be o le modiradibe. Gobane, modiradibe wa modumedi ke yo mobemobe go bohole. Ke wo mobemobe. Jesu o boletše bjalo. Ke moyo wo mobemobe.

⁷⁰ Ka gona o ka ya kopanong moo go lego maatla a magolo a Morena! Gomme selo sa pele o tla se bolelago, ge o o bone, “Bjale, ke no makala. Ge ke hlakahlakane ka Wo, ba tla mpha lengwalo la ka kerekeng.” O bona mo o lego gona?

⁷¹ Bjale, mohlomongwe ga o dire. Go ne dikerekemaina tše kaone, badiša ba bakaone, Mamethodist, Mabaptist, mehuta yohle ya go fapana ye e dumelago ka go mosepelwa Modimo wa kagodimogathago, tše di dumelago gore motho o swanetše go tswalwa gape gomme a tlatšwe ka Moya wo Mokgethwa. Gomme ke leboga Modimo bakeng sa ye nngwe le ye nngwe ya tšona. Go ne ba bantši ba bona ba ba dumelago. Modimo o ne bana ba Gagwe ba tantšwe ntłe ka go lefelo le lengwe le le lengwe. Eupša se ke lekago go se bolela, ka go bontši o bo hwetšago ntłe, dikereke tše o tšohle.

⁷² Ke nyaka go le botšiša se sengwe lena batho ba Methodist, ba le sa dumelogo go phodišo Kgethwa. Go reng ka John Wesley, mothomi wa lena? Ge a be a namela pere ya gagwe, go rapelela mosadi wa go babja, gomme pere ya thitšwa ka moleteng wa

peba, gomme ya wa le go robega leoto la yona. John o ile a fologa pere ya gagwe, a tsea leptolelo la oli, gomme a re, "Morena, O dirile pere ye, go swana le ka mo O ntirilego," gomme a tlotša pere ka oli. Gomme a e namela a otlela a tloga. Go reng ka seo? O se rera go kereke ya Methodist ya sebjalebjale lehono, ba tla go lahlela ka ntle ga mojako. Nnete.

⁷³ Eupša le bona se e lego sona? "Mme malegogwana wa kgale," wa Beibele, Kutollo 17, o bile le barwedi. Gomme ka mnene ga ka swanela go ya ka botlalo go seo. Boprotestant ke setšweletšwa sa Boroma. Nnete, ke sona. Ba tlišitše dilo tša bona tše ntši ntle, ba sa lekeletše go yona. Ba sa e dira, kgolekgole go tloga go Thuto ya Lengwalo, kgolekgole go tloga go Thuto ya baapostola.

⁷⁴ Ba itiretše Thutotumelo ya Baapostola bonabeng. Ke nyaka motho e ka ba mang go mpotša moo baapostola ba kilego ba tsopola—tsopola thutotumelo boka yeo. Ga se gwa ke, ga se gwa ke! Eupša le robetše godimo ga yona.

⁷⁵ Gomme le bitša baprista ba lena "Tate." Gomme Jesu o rile, "Se bitšeng motho yo mongwe 'Tate.'"

⁷⁶ Gomme lena batho, le hwetša dipuku tše nnyane tša thapelo tša lena ntle, bobedi Protestant le Katoliki, gomme le bolela dithapelo, gape le gape le gape, bobedi Protestant le Katoliki. Gomme Jesu o rile, "Le se ke la šomiša go touta ga lefeela boka bahetene ba dira; ba nagana ba tla kwewa, go polelo ya bona ye ntši."

⁷⁷ Le a bona, pitša e ka se bitše ketlele gore ke ye ntsho. Yeo ke nnene. Yohle e ka fase ga kahlolo, teori ye nngwe le ye nngwe ya madirwakemotho. Gomme ke lebakala leo ka go tsošeletšo boka ye, etla go toropokgolo, ditulo tše di dutše di se ne batho. Eupša Modimo o tla Le romela, golebjalo, gomme maphephe a tla Le thuthupiša. Gomme ka Letšatši la Kahlolo, ge o biletšwa go araba, o tla hwetšwa molato bjalo ka ge ba bile morago kua.

⁷⁸ A Jesu ga se a re, "Kgosigadi ya Sheba, Kgosigadi ya Borwa, o tlide tsele yohle go tšwa dikarolong tša kgolekgole tša lefase," a dutše mokokotlong wa kamela, dikgwedi tše tharo, "go bona mpho ya Modimo, e bego e le Salomo"? O rile, "Ruri, ke re go lena, yo mogolwane go feta Salomo o fa."

⁷⁹ Gomme ke re, bošegong bjo, gore yo mogolwane go feta Salomo o mo. Ke Motho wa Kriste, ka go Moya wo Mokgethwa, a dira le go šoma, a tšweletša ka go bophelo bja motho feela boka A dirile mo.

⁸⁰ Modimo o go dirile lefelo le le ka kgothlwago. Bjale, o ka se ke wa no nathiša bophelo bja kgale. O ka se kgone go kaonafatša bophelo bja kgale. O swanetše go hwa, gomme bophelo bjo boswa bo tswalwa ka go yena. Ga a hloke manekura tsoko goba ke eng le se beago godimo ga dipounama tša lena, seo basadi ba se dirago, le a tseba, go ba dira ba lebege bokaonekaone. Ga a hloke go dira

moriri dikhele. Ga a hloke setlotšadipounama. Kereke e hloka Tswalo le go tlatšwa ga Moya wo Mokgethwa.

⁸¹ Ka moriri wa gagwe o dirilwe dikhele le dipounama di pentilwe, o sa no ba mosetsana wa go swana wa kgale. O sa no ba mokamaki. O sa no ba yena, o ne dipelaelo tša gagwe. O na le dipoifo tša gago. O na le yenamong tšohle di leka go diega. Gomme ga a nyake go kwa Therešo, gobane selo se se lego ka go yena se ka se mo dumelele go e dira. Yeo ke nnete. Nnete.

⁸² Mosadi wa tumo ye mpe mo mekgotheng, o sepelela godimo le go mmotša, “Hei, mosadi, o phošo.”

O tla re, “Kgona tša gago mong.”

⁸³ Gomme moleloko wa kereke wa molala wo mothata o mobe makga a šupago go feta mosadi yola.

⁸⁴ Mmotše, “Go na le tsošeletšo ye kgolo e a kgatlampana. O swanetše go tla tlase. Morena Jesu o iponagaditše Yenamong, a fodiša balwetši. Batho ba, le go ya pele, amogela Moya wo Mokgethwa.”

⁸⁵ “Tšwelapele! Bothata ke eng ka wena? Ke nna wa kereke. Ke lokile bjalo ka wena.” Gobaneng? Ga a tsebe bokaone e ka ba bofe.

⁸⁶ Eupša o bolela le mosadi wa go hlomphega le go mmotša ke phošo go dira seo. O tla re, “Amene. Ke a tseba ke phošo.”

⁸⁷ Gomme o botša monna goba mosadi, yo a tswetšwego gape ka Moya wa Modimo, gore kolobetšo ya Moya wo Mokgethwa e mo bakeng sa bona, go tlatša pelo ya bona. Ba tla goeleta “amene” go Wona, gobane ba iphepa le go phela ka Lentšu la Modimo. Nnete, ba a dira.

⁸⁸ Eupša, le a bona, bjalo ka ge go le ka lefaseng go bjalo ka kerekeng. Ba leka go aga se sengwe. Modimo ga a hloke thušo ya gago go aga Muušo wa Gagwe. Modimo o no go nyaka o rere Lentšu. O tla dira go aga. Yena ke Mohlami. O na le dipolane di letše ntle Mo. Go lokile.

⁸⁹ Re dira eng gona? Modimo o go diretše lefelo go kgothola, dilo tša lefase. Bjale, tlhago e beile moya ka kua wo o go dirago o rate dilo tša lefase, gomme o a tseba o phošo ge o dira seo.

⁹⁰ Ge e ka ba o moleloko wa kereke, o ka no ba wa bodumedi ka mo o ka kgonago go ba, gomme wa no tlala diabolo, le bjona. Yeo ke nnete. Ge o kamaka Lentšu la Modimo, Lentšu le lengwe le le lengwe la Lona go ba therešo, ke diabolo a go botšago seo. Nnete, ke yena. Ke bošoro. Eupša ke nako, nako ya godimo gore moreri tsoko yo monnyane wa go sadifatšwa a role diatla tša gagwe tša rapa gomme a rere Ebangedi ka tsela ye E ngwadilwego, gomme a tlogele go leka go phiphila tikologong ka boitemogelo tsoko bja seminari.

⁹¹ Ka mehla ke kwela letsuana la sealamedi bohloko. Letsuana le le tswetšwego ka go sealamedi, tswio, gomme ga le na mama go ya go yena. Seo se mpea ka go monagano wa moreri wa seminari yo a sa tsebego go feta ka Lentšu la Modimo go feta se seminari e se boletšego; tswio, gomme ga go Mama go ya go yena.

⁹² Eupša ge ka kgonthe o tswetšwe ka tlase ga diphego tša mogau wa Gagwe le maatla, o tla dumelana le Lentšu le lengwe le le lengwe A le boletšego, ke Therešo. Gomme ge Modimo a sepela kagodimogatlhago, pelo ya gago e tla Le swarelwa ke tlala thwi.

⁹³ O ka se tšwele ka thoko gomme wa re, “Go bala monagano! Diabolo! Beletsebubu! Ga ke dumele Leo. Kereke ya ka ga e Le rute.”

⁹⁴ O tla re, “Modimo a tumišwe neng le neng,” gobane o tladišwe. O ka se dule o se ne selo.

⁹⁵ Go se be le selo ke go tsekella. Bjoo ke bjo e lego bothata ka basokologi lehono. Ka pejana ge o sokologile, o thoma go tsekella tikologo. O tlamega go be o le kua matolong a gago, o nyaka Modimo bakeng sa kolobetšo ya Moya wo Mokgethwa, go tlatšwa. Ka gona o ne leboto, Bogona bja Gagwe bja go segofala le wena. Gomme ge lenaba le etla ka gare, boka tau ka legolong bošego bjola le Daniele, Seetša sa Modimo se phadima ntle gomme o tšhaba go tloga go wena. “Ge monna wa go loka wa ntlo a se a e šireletša.” Nnete.

Bjale, go kopana, ka Letšatši la Pentecost.

⁹⁶ Goba, feela pele ga yona, barutiwa ba be ba hlwekišitšwe bohole, dibe tšohle tša bona di be di lebaletšwe. Gomme Jesu, Modiši, kgogotshadi ya kgale, bjalo ka ge go bile, bjalo ka ge A rile A “ka be a ba kgobetše bjalo ka kgogotshadi,” segola sa Gagwe. Ka gona, ge moyo wa diabolo o rakilwe, ba letile nako ya go tlatšwa.

⁹⁷ Gomme, efela, ka go bao bohole, banna ba lesomepedi feela, yo mongwe wa bona o hweditše tlotšo ya diabolo, gomme morago ga ge a bone Jesu a dira mediro ye mekaone yela yohle. E bile yena yo a dirilego masole go bea lešela go dikologa hlogo ya Gagwe, le go Mo itia godimo ga hlogo ka morogo goba lepara, le go re, “Re botše ke mang a Go iteilego. Re tla Go dumela.” Morago ga go latela Jesu le go bona mehlolo ya Gagwe, le go kwa. Mojuda o tla godimo, gomme Jesu o a mmotša o be a le mang, mo a tšwago gona. Morago ga go bona tseo tšohle, monna yo wa go swana o ile a e belaela, morago ga go Mmona sedibeng sa Samaria, le mosadi, a mmotša dibe tša gagwe. Gomme o kwa Mofarisei a re, “Yena ke mmolelelamahlatse.” Gomme morago ga go bona Jesu wa go ratega, mosadi a kgwatha kobo ya Gagwe gomme a fodišitšwe, o be a sa ntše a sa dumele. Gomme a dumelala moyo wa gosedumele go tla godimo ga gagwe, gobane o be a laetšwe ka ntle. Le bona se ke se rago?

⁹⁸ Oo, a selo sa go šiiša gosedumele go lego sona! Gomme efela, batho ba ipolela Bokriste, ba dutše le goo ka go bona. "Hlogothata, monagano wa godimo," Beibele e rile, "ka letšatšing la mafelelo." A ke ikwela go se tlwaelege ka yona? Aowa, mohlomphegi. E ntira ke tsebe se, gore nako ya bofelo e kgauswi. Gobane Beibele e rile, "Moya o boletše ka tlhagišo," le tseba se lentšu *tlhagišo* le se rago, "gore ka matšatšing a mafelelo," yeo ke ye, "dinako tše thata di tla tla, gobane batho e tla ba baithati bonabeng."

⁹⁹ "Ke nna Ngak. Ph.D. Jones, le boitemogelo bja ka—bja ka bja seminari. Ke—ke na le digrata tšohle tša ka. Ke nna LL, ya go hlatlagana L. D. Modiša wa rena ke sohle *se, seo.*" Seo ga se ne selo se tee go dira le Modimo.

¹⁰⁰ Ke bile le monna o tlide, e sego botelele go fetile, o rile, "Ngwanešu Branham, nka ritela leboto la gago ka digrata." Gomme o rile, "Nako ye nngwe le ye nngwe, ge ke be ke hwetša grata ya ka ya bongaka, ke be ke nagana ke tla hwetša Kriste. Ge ke hwetša grata ya ka ya dingwalwa, ge ke hwetša grata ya ka ya pulamadibogo, ke be ke tsoma Kriste ka go yona yohle. Gommme ga se ka Mo hwetša le gabjale." O rile, "A barutiši ba be ba le phošo?"

¹⁰¹ Ke rile, "Kriste ga a tsebje ka digrata tše tša thutamodimo, eupša O tsebja ka go motho wa Moya wo Mokgethwa wo o tlide fase ka Letsatši la Pentecost."

¹⁰² Gomme monna o wetše go kgabaganya tafola ya ka ya kofi, ka kamoreng ya ka ya bojelo, gomme fao a amogela Moya wo Mokgethwa. Amene. Tšhemong bosegong bjo, o rera phodišo Kgethwa, e lego yo mongwe wa banna ba go itlhaola ba letšatši. Kereke e dirile eng? E mo rakile, thwi ka pela. "Ba lehlogenolo ke lena ge ba le ntšhetša ka ntle ga disinagoge le dilo, bakeng sa Leina la Ka."

¹⁰³ Se Beibele e se boletšego, "Ba tla ba hlogothata, monagano wa godimo." Neng? "Ka matšatšing a mafelelo. Barati ba thelebišene, maipshino, go feta barati ba Modimo. Babatasekgoro, baphari ba maaka."

¹⁰⁴ "Bjale ke tla go botša. O se ke wa ya tlase kopanong yela, gobane ga go selo go yona." Baphari ba maaka! Beibele e boletše bjalo. "Ba na le sebopego sa bomodimo, eupša ba gana maatla a bjona." Ke maatla a eng ao?

¹⁰⁵ Barutiwa ba botšišitše. Nakwana feela. Barutiwa ba botšišitše potšišo ye ge ba bone gore Judase o Mo ekile gomme se sengwe le se sengwe se be se le kgauswi. Ba rile, "Morena, a O tla bušetša mmušo go Israele nako ye?" Šetša se A se boletšego. "Ga se ga lena go tseba iri yeo. Eupša eyang godimo go toropokgolo ya Jerusalema, gomme le tla hlamišwa ka maatla go tšwa Godimo pele le ka ba hlatse." Hlatse e swanetše go tseba se sengwe. Hlatse

e swanetše go ba le boitemogelo. Gomme o ka se kgone go ba hlatse ya Kriste go fihla Moya wo Mokgethwa o go kolobeditše.

¹⁰⁶ Jesu o be a ka se dumelele barutiwa ba Gagwe go rera Ebangedi go fihla ba amogetše Moya wo Mokgethwa. Efela, ba be ba hlomphilwe go sepela le Yena, mengwaga ye meraro le seripa. Le ge ba be ba le banna ba bakgethwa, ba amogetšwe pele ga Gagwe, eupša O ile a se ke a ba dumelela go rera go fihla ba letile godimo kua le go ntšhetša diphapano tšohle ka ntle ga bona, gomme ka gona Moya wo Mokgethwa o tlie.

¹⁰⁷ Se lefase le se hlokago lehono ke go tlatša gola ga go swana. Ge go kgotholela ntle go etla, go hloka go tlatša. Go tlatša goo go dira eng ge O etla? Mo o nago le pelaelo, go tliša tumelo. Moo o nago go hloka tirišano, go tliša lerato. Mo o bego o ne lehloyo, go tliša kopanelo.

¹⁰⁸ Gomme ka gona, ge, Kereke ya Modimo wa go phela letšatši le lengwe e tla kopana ka tlase ga Hlogo e tee ye kgolo, gomme yeo e tla ba hlo—hlo Hlogo ya Modimo. Modimo, gomme ka go kopano ya Mmele wa Kriste, o tla ba Mmuši le Kgoši le Morena, godimo ga Kereke yohle, ka fase ga taolo ya Gagwe. Ka gona O tla amogelwa godimo.

¹⁰⁹ Lehono, ditora tšohle tša Babilonia di ka no agwa, dirokete tšohle di ka no hwetšwago, bosošiale bjohle le bokomonisi bjo bo ka no huduago, ditshepedišo tšohle tša bokereke di tla šitwa. Eupša go e na le yeo yohle, Modimo o tla ba le Kereke ye e kopanego ka tlase ga Kgoši ya Gagwe, ka tlase ga Bogoši bja Gagwe, ka kolobetšo ya Moya wo Mokgethwa.

¹¹⁰ Jesu o rile, “Maswao a a tla latela bona ba ba dumelago: ka Leina la Ka ba tla lelekela bodiabolo ntle; ba bolela ka maleme a maswa. Ge ba ka swara disephente goba ba nwa selo e ka ba sefe sa go bolaya, se ka se ba gobatše. Ba tla bea diatla godimo ga balwetsi, ba tla welwa ke maruru.” Maswao a magolo le matete! “Mediro ye Ke e dirago ba tla e dira le bona. Ebile le ye mentši go feta wo ba tla e dira, gobane Ke ya go Tate. Lebaka le lennyane lefase le ka se Mpone gape, efela lena le tla Mpona, gobane Ke tla ba le lena.” Eng? Tšhollelang ntle, kgotholang. “Gona Ke tla ba ka go lena, go fihla bofelong bja lefase, mafelelong.” Nnete. “Ke tla ba le lena, ebile le ka go lena, go fihla bofelong bja lefase.”

¹¹¹ Ge Moya o le ka kua, O swara Lentšu la Modimo la Gosafelego, gomme O bitša se sengwe le se sengwe go fapana le Lona mo o ka rego se be se se gona, ga go kgathale se se diregago, se lefase le se bolelago, se e ka ba eng gape se se bolelago. Ge Modimo a dirile tshepišo, motho yo a hlamišitšwego ka Moya wola o tla swarelala go tshepišo yeo ya Modimo, gobane ga go selo gape ka tseleng ya gagwe.

¹¹² Kereke e sekile. Kereke e hlatswitšwe ka Moya wo Mokgethwa. Letswalo la bona, matšhogo a pelaelo le gosedumela a tlošitšwe. Gomme ge ba ekwa Lentšu la Modimo le bolela selo

se se itšego, ba a Le dumela. Oo! Ba swarelela go Lona. Ba no se šuthe go tloga go Lona.

¹¹³ Gomme lefase lehono, mogwera wa ka, le nyaka go bona batho ba ba kopanego le Kriste, go pealatša Moya kgonthe wa mmapale wa Kriste. Bagale ba bogale!

¹¹⁴ Go tswaleleng, nka no re, lefase le nyaka go bona bagale. Ba hlompha mogale. Ke mo gobotse. Polelo ya kgale ke, gore, “Mafšega a hwa makga a milione, mola bagale ba sa tsoge ba hwa.”

¹¹⁵ Go ne kanegelo e tla monaganong wa ka. Ke nyaka go le tsopolela yona feela metsotso e se mekae. Ke kanegelo ya mogale yo gantši a lebalegago kudu. Ba bantsi ba lena banna, ba mengwaga ya ka, le lena basadi, le tla e elelwa gabotse ka go dipuku tša rena tša sekolo.

¹¹⁶ E bile mengwaga ye mentši ya go feta ka Switzerland. Batho ba bannyane ba Maswiss ba be ba ile godimo ka dithabeng gomme ba ikagetše dintlo tsoko bonabeng. Ba be ba ne ekonomi ya bonabeng ye nnyane, le go ya pele, magae a bona a manyane. Gomme ba be ba a rata. E be e se batho ba go lwa. E be e le batho ba khutšo.

¹¹⁷ Gomme gateetee, nako ye nngwe, go ttile ka Switzerland, sešole se segolo se maatla. Gomme e be e le banna ba ba hlahlilwego gabotse, ba nno dula boka tšona ditulo fao, fela boka leboto la setena; dikotse tše kgolo, marumo a magolo, banna ba ntwa ba go katišwa gabotse. Gomme ba ttile ba matšetša ka Switzerland, go tše se Maswiss ba bego ba na le sona.

¹¹⁸ Gomme Maswiss, go hlapetša magae a bona, ba atlige basadibagatša ba bona go ba šadiša gabotse, le bana ba bona le masea, ba tšere diripana tša bona tša makintlwane, maswika le matlapa, marumo a magolo bogolo a kgale, gomme ba ya moeding, go gahlanetša sešole se se tlago. Gomme ge ba ttile mmogo ntle kua, e no ba banna ba bannyane nthathana ba go tlala seatla, gomme gohle go ba dikologa go be go le sešole se segolo sa metšene. Ba be ba ka kgona go dira eng? Ba eme ba se ne kholofelo, ba se ne thušo, yo motee o lebeletše yo mongwe. Ba be ba latswitšwe. Ga go tsela go e rarela. Ba be ba fedile.

¹¹⁹ Morago ga lebakana, go be go le mmona ka leina la Arnold von Winkelried. O gatetše ntle, gomme o rile, “Banna ba Switzerland, mošola go kgabaganya thaba go ne legae le lennyane le lešweu moo mosadimogatša wa ka le bana ba bararo ba bannyane ba letilego.” O rile, “Ge ke ba atlige go ba laela, mosong wo, nka se tsoge ka ba bona gape lefaseng le.”

¹²⁰ Ba rile, “Arnold von Winkelried, o ya go dira eng?”

O rile, “Letšatši le, ke tla hwela Switzerland.”

¹²¹ “Gabotse,” ba rile, “Arnold von Winkelried, seo se ka se dire botse. Gobaneng o re o tla hwela Switzerland?”

¹²² O rile, “Lena tšeang se le nago naso; matšepe a go lema, disekele tše nnyane tša kgale, mapara le marumo, maswika.” O rile, “Lena le ntatele, gomme le lwe bokaone bjo le kgonago ka se le nago le sona.”

Ba rile, “O tla dira eng?”

¹²³ Gomme o lahletše sekele ya gagwe fase, selo sa gagwe se a bego a eya go lwa ka sona. O phagamišeditše diatla tša gagwe godimo, gomme a goeletša go sešole se segolo sela.

¹²⁴ O lebeletše go dikologa. O lebeletše mo go bego go le bokotokoto bja marumo. Feela yo mongwe le yo mongwe ka go nomoro ya yunifomo, ba ba matšiša kgahlanong le thaba, pele, pele. (Oo, ke ka tsela ye diabolo a dirago.) Ba ba matšiša thwi go ya sekhutlong.

¹²⁵ O phagamišitše seatla sa gagwe, gomme a goeletša, “Dirang tsela bakeng sa tokologo!” Gomme sešole se se bego se etla se maketše eng. Gomme a thoma go kitima, gomme a goelela gape, “Dirang tsela bakeng sa tokologo!”

¹²⁶ Gomme ge a fihlile ka go bogolo sehlopha se segolo se sa marumo, moo a mantši a bego a šupile, go mo swara, o ntšreditše matsogo a gagwe ntle ka mokgwa *wo*, gomme a tšeal letsogo ka moka la go tlala marumo ao gomme a a lahlela ka sefegeng sa gagwe. Pealatšo ye bjalo ya bogale bja kgonthe, e gakantšitše sešole se segolo sela, gomme ya ba fapoša.

¹²⁷ Mo go tla Maswiss, ka marumo le mapara, gomme ba itia sešole sela go tšwa setšhabeng sa bona. Gomme ga se ba tsoge ba ba le ntwa go tloga nako yeo go fihla go ye, gobane monna yo motee o ralokile karolo ya mogale gomme o dirile se e bego e le sa maleba. Seo ga se sa ke sa tsoge sa fetwa, gomme ga se gantši go bapetšwa le sona, bjalo ka bogale.

¹²⁸ Eupša, oo, seo ke selo se sennyane bjalo, go letšatši le lengwe, mengwaga ye mentsi ya go feta, ge bana ba Adama, morafe wa lefase le, o be o rakeletšwe sekhutlong, ka malwetši le mekomane le sebe. Ba rometšwe baprofeta, gomme ba ba bolaile. Gomme bona, mehuta yohle ya melao, gomme ba e ganne. Gomme morafe wa Adama o be o rakeletšwe sekhutlong.

¹²⁹ Go bile yo Motee Yo a gatetšeego ka ntle ga Legodimo, gomme o rile, “Ke ya tlase lefaseng letšatsing le go nea Bophelo bja Ka.” O hweditše moo leswethe la mesebe le bego le le gona. Gomme dipoiro tša morafe wa Adama e be e le lehu. O ubutše lehu, ge A be a eya Khalibari, gomme a le gogela ka sefegeng sa Gagwe.

¹³⁰ Gomme O boditše barutiwa ba Gagwe, “Kgotholang bjale. Eyang mošola mo... Letang godimo mošola go fihla Ke le romela Sengwe morago go lwa ka sona.” Go šegofatšwe... Ntshwareleng. A go šegofatšwe Leina la Morena. O rometše Moya wo Mokgethwa, gomme o rile, “Latelang Nna. A ripa sebe le bolwetši mo lebotong.”

¹³¹ Banna le basadi, selo se segologolo se kilego sa fiwa Kereke ya Modimo ga se go swara lephepha tsoko la kereke ka seatleng sa gago, eupša go tlatšwa ka Moya wo Mokgethwa wa Modimo, le go ripa mmušo wa diabolo go fihla Mokapotene Mogolo wa rena a etla go tsea taolo.

¹³² Modimo a le šegofatše. Le se ke la nagana ke a hlanya. Yeo ke therešo. Ke tseba se ke bolelago ka sona. Banna ba go hlomphega; basadi, lena ba le dumelago go Modimo; lena ba le tleleimago go ba le Moya wa Modimo ka pelong ya lena. Ge o babja goba o hloka, o na le sebetša fao go lwantsha bolwetši bjoo ka sona. Se ka go wena. Modimo o go file sona.

¹³³ Gobaneng re ema morago boka mafšega? Gobaneng re ka ema ka mothalong wa ka thoko? A re lateleng Mokapotene. A re latełeng Yena yo a ilego Khalibari. Ge A ile Khalibari, "O ile a gobatšwa bakeng sa karogo ya rena. Ka megogoma ya Gagwe re fodišitšwe."

¹³⁴ Tšeang seo A le fago sona, gomme le lwantšhe bolwetši le sebe. Lwantšhang gosedumele. Botšang diabolo ke yena moaketši. Kriste o rile O fentše lefase. "Yo mogologolo ke Yena yoo a lego ka go lena go feta yoo a lego ka lefaseng." A magologolo ke maatla a Kriste, ka go wena, go feta bolwetši bjola o nago le bjona ka mmeleng wa gago bošegong bjo. A magologolo ke maatla a Kriste, go feta se sennyane sela, sebe sa go tshwenya se o sa kgonego go se fenya. A re tšeeng Moya wo Mokgethwa wola gomme re lwantšeng diabolo, gomme re sepelele ntle re fentše, bjalo ka bagale ba sefapano.

A re rapeleng.

¹³⁵ Jehofa, Jehofa-rapha, Jehofa-jireh, re tla ka go la Jesu Leina. Re a tla gobane o rile, "Kgopelang Tate eng kapa eng Leineng la Ka, Ke tla se dira."

¹³⁶ Sese sehlopha se sennyane sa batho mo, bošegong bjo, ba ba thekeselago go bapa, ba leka go dula ka fase ga folaga, gomme diabolo o a ba tswinya. Ba lebeletše ntle kua go leboto le legolo lela la sešole leo le lego gohle go ba dikologa, le go ba botša, "Matšatši a mehlolo a fetile, gomme ga go selo se sebjalo."

¹³⁷ O Morena Modimo, anke ba tlimarele go swarelela Bophelo bjola Bosafelego bjo bo tluditšego pelo ya bona, Moya wo Mokgethwa. Gomme ge A se a ba tlatša, a nke A e dire gonabjale. Anke dipelaelo tšohle di nyamalale. Gomme anke mmele wo monnyane wo wa batho, bošegong bjo, o tlatšwe ka maatla a Modimo a go tlatša, go tsea lefelo la gosedumele le pelaelo. Gomme ba fe tumelo, le lerato, le lethabo, le thabo, le Moya wo Mokgethwa, go swara tshepišo yela ye Modimo a e fago, boka Abraham wa kgale, le go bitša dilo, tše di sego gona, mo o ka rego di be di le gona, gobane Modimo o boletše bjalo. E fe, Morena.

¹³⁸ Ge re sa ne dihlogo tša rena di inamišitšwe, mogohle ka moagong wo, ke a makala ge eba go ka ba motho ka mo ntle le

Moya wo Mokgethwa, bošegong bjo, a ka rego, “O Morena, eba le kgaogelo go nna. Ke na le dihlong gore ke kadietše go dikologa ditora tše tsa ditshepidošo tsa bokereke tsa madirwakemotho, tsa pelaelo yohle ye le dilo tše ba di tšweletšago le yona. Morena, nntšhetše ka ntle ga mmušo wo, bošegong bjo, gomme mpee ka mmušong wa Gago, ka kolobetšo ya Moya wo Mokgethwa. Ke a O nyaka bjale, Morena. Mphe tumelo go dumela bakeng sa pholo ya ka. Mphe tumelo go dumela gore dibe tsa ka di sepetsé, le dilo tšohle tše. Mphe tumelo gore Moya wo Mokgethwa o tla tla ka go nna gomme wa no golobelela soulo ya ka ka thabo.” A o ka phagamiša diatla tsa gago go Yena le go re, “Ke nyaka go O amogela”?

¹³⁹ Modimo a go šegofatše, mohumagadi. Modimo a go šegofatše, wena, wena, wena. Gohlegohle ka moagong. Modimo a go šegofatše morago fale, mohumagadi. Ke letile. Modimo o šeditše. Gomme wena godimo mo, mothalo ohle ka mo. Ee. Modimo a le šegofatše.

¹⁴⁰ “Ke nyaka Moya wo Mokgethwa. Ke lapile, go ya go dikologa, tselaseripa ya bophelo. Dibefedi, go baka le go kgorometsana, le dipelaelo le dipoiro ke tšohle ka pelong ya ka, Ngwanešu Branham, eupša ke e nyaka e tšwele yohle. Ke nyaka go ba lefelo mo nka kgonago go ba seetsa sa go phadima. Ke nyaka go ba, bophelo bja ka, go ba boka Stefano, ka mo a bego a se ne poifo.”

¹⁴¹ Ba rile sefahlego sa gagwe se phadimile bjalo ka morongwa. Se be se se sa swanela go ba seetsa sa leutu. Morongwa o be a tla makala. O tseba se a bego a bolela ka sona. O eme pele ga Kgorotsheko ya Sanhedrin gomme a re, “Lena ba melala ye methata, mašoboro, pelo le ditsebe! Le ganetsa Moya wo Mokgethwa. Bjalo ka ge borroweno ba dirile, kafao le a dira.” E be e le morongwa. O be a ne molaetsa. Lentšu *morongwa* le ra “motseta.”

¹⁴² “Mphe, ntire motseta, Morena, wa maatla a Makgethwa a Kriste, ka Moya wo Mokgethwa ka pelong ya ka.” A o ka phagamiša seatla sa gago, yo mongwe gape a sego a dira?

¹⁴³ Ditšhegofatšo godimo ga gago, mohlomphegi. Ditšhegofatšo godimo ga gago, mohumagadi yo moswa. Modimo a go šegofatše, lesogana. Morena o a go bona. Gabotse. Go lokile.

¹⁴⁴ Bjale ka dihlogo tsa lena di inamišitšwe, a re rapeleng Modimo go le tlatša ka Moya wo Mokgethwa, thwi moo le lego.

¹⁴⁵ “Ngwanešu Branham, o nyaka go tla fase, o bee diatla godimo ga ka, bakeng sa Moya wo Mokgethwa?” Ga ka swanela go dira.

¹⁴⁶ “Ge Petro a sa bolela Mantšu a ka ntlong ya Koronelio, Moya wo Mokgethwa wa wela godimo ga bona ba ba kweleko Lentšu.” “Tumelo e tla ka go kwa,” e sego go bea diatla godimo, eupša go kwa, “go kwa (eng?) Lentšu la Modimo.”

¹⁴⁷ Ke lekile, ka tsela ya ka ya go kokobela, go le laetsa ditora tše di agiwa, ditora tša Babilonia tše di swanetšego go wa. Gomme ke le šupetša Tora. Gomme go ne tsela e tee feela godimo ga Yona, yeo ke ka Moya wo Mokgethwa.

¹⁴⁸ O ka se kgone go dula magaranakeng. Beibele e rile, ka go letšatši le, gore, "Motho mang le mang a sega a swaiwa ka Moya wo Mokgethwa o tla ba le mmaraka wa sebata." Mmaraka wa sebata ke eng? Gosedumele. A ga le tsebe se ba lego... ge modiša wa lena a le rutile. Ka go Testamente ya Kgale, ge phalafala e be e galagatšwa, ge motho a be a nyaka go lokologa, o be a kgona go lokologa. Ge a be a sa nyake, o be a tla sepelela kwateng gomme a be le tsebe ya gagwe go thubolwa ka tšhuduba, gobane o ganne go lokologa. Gomme ge o gana go lokologa, gona o tla šomela mongmošomo matšatši ka moka a gago, gomme o lahlegile.

¹⁴⁹ "Leswao la Modimo ke eng, Ngwanešu Branham?" Moya wo Mokgethwa.

O re, "A ke go ya ka Lengwalo?" Ka nnete, a mantši a ona.

¹⁵⁰ Anke ke le feng le tee gore le se ke la le lebala. Baefeso 4:30 e rile, "Le se ke la nyamiša Moya wo Mokgethwa wa Modimo, wo le swailwego ka wona go fihla letšatši la topollo ya lena." Go ne Leswao la Modimo. Ke seo ke lekago go le botša. Le lebeletše Leswao la Modimo go tla ka letšatšing la mafelelo. Ga le phatleng ya gago. Go re le be le le *phatleng* ya gago ke ya gago "tsebo, go kwešiša." Eupša Beibele e rile Leswao la Modimo ke Kolobetšo ya Moya wo Mokgethwa. Gomme yo mongwe le yo mongwe a nago le Wona, dipelo tša bona di lokologile. Ba swailwe ka tsebo ya Modimo, ka phatleng ya bona, gore ba tseba gore Jesu o hwile gomme o tsogile gape, gobane ba kgona go Mmona.

¹⁵¹ "Lebakana le lennyane, gomme mosedumele a ka se Mpone gape. Efela, lena le tla Mpona," bao ba nago le Leswao, "gobane Ke tla ba le lena, ebile le ka go lena, go fihla bofelong bja lefase. Mediro ye Ke e dirago le tla e dira le lena, le ye megolwane go feta wo, gobane Ke ya go Tate wa Ka."

¹⁵² Lefase la gosedumele le sepela go bapa ka leswiswing la kgotlombo, go dikologa tora tsoko ya Babele. Kgwatho, gomme ba se sengwe sengwe go dikologa tumelokhwele tsoko, tumelothoko tsoko. Mola, modumedi wa kgonthe le maswao le matete, gomme e utilwe go tloga go mahlo a mosedumele. Bulang dipelo tša lena bjale le Mo dumelele a tle ka gare.

¹⁵³ Ke ya go kgopela badiredi, gape, ka meagong, go rapela gagolo ka nako ye.

¹⁵⁴ Ye ke nakwana ye kgolo. Nakwana ye e tla swaya bofihlo, ntle le pelaelo, bja ba bantši. Soulo e tee e turwa mafase a dikete tše lesome! Nakwana ye ke ye kgolo gakaakang.

¹⁵⁵ Morena Modimo, Mohlodi wa magodimo le lefase, Jehofa, obeletša fase feela bjale ka dikgaogelo tša Morena Jesu, Yena Mošegofatšwa, gomme tšhollela Oli ye Kgethwa ya Moya wa Gago ka go pelo ye nngwe le ye nngwe mo, bao ba swerwego ke tlala. Go ngwadilwe ka Beibeleng, “Ge Petro a sa bolela mantšu a, Moya wo Mokgethwa wa wela godimo ga bona.” Ga go makatše; bohole ba be ba nyorilwe. O rile, “Ba lehlogonolo ke lena ge le tla swarwa ke tlala le go nyorelwa toko, gobane le tla khorišwa.”

¹⁵⁶ Re ka kgona go bolela bjang le batho ka Kriste ge ba se ba Mo nyorelwa? Ge, ba dutše ka dikgopolong tša bona tša madirwakebatho, gomme ba kgotsofetše, ba sa tsebe gore ba “hlomolapelo, ba nyamiša, ba fousetše, gomme ba diila, gomme ga ba e tsebe.”

¹⁵⁷ Modimo, eba le kgaogelo, bošegong bjo, go bao ba phagamišitšego seatla sa bona, bao ba ratago bakeng sa Moya wo Mokgethwa go tla ka gare. Anke A tle, a tle tlase ka meela ya ditšhegofatšo tša Gagwe bjale, e tšhologe ka go pelo ye nngwe le ye nngwe, le go ba tlatša go go phophoma ga thabo, gore ba ke ba tsebe gore O a phela. Ba fe kwesišo ya mokgwa wa go Go amogela. Ba fe kwešišo gore O fao, o hlologetše kudu go tsena ka pelong ya bona go feta ka mo ba lego go ba le Wena.

¹⁵⁸ Anke maikutlo a mangwe le a mangwe a sego a tlwaelega, letimone le lengwe le le lengwe le dutšego tikologong, le tswinyago, “Bjale, o ka se O amogele. O ka se O amogele.” Anke ba bitše diabolo yoo “moaketši.” Modimo o dirile tshepišo, gomme Modimo o tla boloka tshepišo ya Gagwe. Gomme re ka kgona bjang, ge re dutše bohole re hunyetše boka pshinyaleraga ka legaping la yona?

¹⁵⁹ Ke a rapela, Modimo, gore O tla tlamolla lešaba le la batho, gomme wa romela Moya wo Mokgethwa fase go tšwa Godimo, ka mokitimo wo mogolo wa maatla godimo ga bona. Anke dipelo tša bona di bulege bjale. Gomme ge feela ba ka no kgona go amogela Moya wo Mokgethwa, Morena, O tla bega go bona gore ditšhegofatšo tšohle tša Modimo ke tša bona. E fe, Tate, Leineng la Morena Jesu. Amene.

¹⁶⁰ A ga le Mo rate? [Phuthego e re, “Amene.”—Mor.] Le a dumela gore Le ke Therešo? [“Amene.”] Ga ke kudu moreri wa bokereke. Ke... Eupša se ke...

¹⁶¹ Ge nka kgona go hlagiša feela se ke se bonago ka pelong ya ka! Ke bona nako ya bofelo. Ke a tseba Molaeša ke therešo. Ge nkabe ke be ke ehwa iring ye, Molaeša ke therešo. Le a bona? Gomme ke a dumela gore mahlo a batho, makga a mantši, a fousaditšwe. Eupša, Modimo ke wa toka, ka go lebaka le lengwe le le lengwe. O romile Noage. Ke ba bakae ba pholositšwego? Ke ba bakae ba pholositšwego ka matšatšing a Loto? Jesu o rile, “Go

tla ba bjalo ka go tleng ga Morwa wa motho.” Nnete, le a bona, ba sego nene feela. Eupša Molaetša o ile pele, feela go swana.

¹⁶² Bjale theetšang. Ke ba bakae ba dumelago gore Modimo o mo? A re boneng seatla sa gago. Ke ba bakae ba dumelago gore Yena ke *Jehofa-Rapha*, “Morena o neelane ka sehlabelo”? Ke ba bakae ba dumelago Yena ke *Jehofa-Jireh*, “Morena yo a go fodišago”? [Phuthego e re, “Amene.”—Mor.]

¹⁶³ Theetša, mogwera. Makga a mantši kudu, bodiredi bja ka ka Amerika bo be bo se maatla kudu, gobane go lebega o ka re batho ba gakanegile kudu—kudu. Yo motee o ruta selo se tee, yo motee se sengwe, go e na le go dula fase le go tšea Beibele le go E bala wenamong, le a bona, le go kgodišwa ke Moya wo Mokgethwa. Bjale, lebelela. Ga o hloke . . .

¹⁶⁴ O rutilwe, “Batho ba Bea diatla godimo ga gago.” Seo se lokile.

¹⁶⁵ Bodiredi bja ka ke go hlatsela bohlatse bja Jesu Kriste a tsogilego go tšwa bahung.

¹⁶⁶ Bjale, ba bangwe ba lena le nagana E be e le go bala monagano. Le ngwadile mangwalo a lena ka gare lehono gomme le boletše bjalo. Bošego bja go feta, ke tšere batho ba ba bilego le dikarata tša thapelo, le go ba gomiša, gomme ka no ba le bao ba lego ntle le dikarata tša thapelo.

¹⁶⁷ Mogwera, anke ke bolele go wena, bjalo ka mohlanka wa Kriste. Gene le Leo ba dutše mo, mogwera wa ka wa hlogo ya kgomo. Ngak. Vayle šo. Morwa wa ka, Billy. Ngwanešu Sothmann šole, molaodi wa Mocanadian. Ngwanešu, Ngwanešu Norman, yo a nago le kopano ye godimo mo. Banna ba bantši. Leletšang toropokgolo ya ka. Leletšang ratoropo, Mna. Hodenpehl. Leletšang moahlodi. Leletšang maatla a sephodisa. Leletšang Ngak. Sam Adair, ngaka ye kgolokgolo ka Borwa, kliniki ye kgolo. Ba botšišeng ke mohuta mang le dipono dife di diregago. Ba botšišeng ge eba ke therešo.

¹⁶⁸ Leletšang Ngak. Sam Adair, bošegong bjo, mmotšišeng se a se dirago ge a tsena lefelong le lethata. O tla godimo ntlong ya ka, o khunama fase ka matolo a gagwe, gomme fale o ipea pele ga Modimo, yena le nna, go fihla Modimo a bontšha pono. Gomme mmotšišeng ge eba e kile ya šitwa nako e tee. Mo leletšeng, ka tshenyegelo ya ka.

¹⁶⁹ Ngak. Sam Adair o šoma kliniki ye kgolo, bošegong bjo. Mmotšišeng ka fao a ilego a ba le kliniki kua. Ge re be re le godimo ntlong ya ka, a lla, gomme o rile, “Toropokgolo e hloka kliniki.” Gomme ke mmuditše moo e bego e tla agwa, gomme o be a tla e aga. O rile, “O—o ka se kgone go reka lefelo lela,” o rile, “mengwaga ye masomepedi tlhano go tloga bjale. Le ka dikgorongtsheko ka Boston.”

¹⁷⁰ Ke rile, “GO RIALO MORENA. E tla ba la gago pele ga diiri tše masomepedi nne.” Ke rile, “O tla ba le kliniki kua, e tla dirwa ka setena se sehubedu. O tla ba le leswao lebating, le go ya pele, le ka mokgwa woo.”

O rile, “Billy, nka se go belaele ka selo, morwa.”

Ke rile, “Morena o go file yona, ngaka.”

¹⁷¹ Mo leletšeng, bošegong bjo, gomme le mmotšišeng se se diregilego. Letšatši la go latela o nteleditše, o rile, “Ke gatsetše go iša lehung. Ba sa tšo nteletša. Gomme se sengwe se diregile bošego bja go feta, gomme re šetše re rekile lefelo.”

¹⁷² Botšišang ka mathata ao a a romelago kua ka kankere, ba jelwe, go se kholofelo le gatee. Re tla mo rapeleta. Ba nthakile bookelong. Re tla ya ka kamoreng le go tswalela mojako. Morena o tla bontšha pono, e ka ba gore feela ge ba eya goba feela se se tla diregago. Mmotšišeng ge e kile ya šitwa.

¹⁷³ Ye e no ba ye nnyane mo. Ye ke . . . Ye ke bonnyane nkilego ka bo bona bo dirwa ka go dikopano e ka ba dife. Yeo ke nnete. Ke lekile se sengwe le se sengwe go dira selo se kgaoge. Ke tla godimo, gomme le a nagana, “dikarata tša thapelo.” Ke retolotše dikarata tša thapelo go dikologa. Ke leka se sengwe le se sengwe. Ke mo bjalo ka mohlanka wa lena le ngwanabolena, dilo tše mo.

¹⁷⁴ Banks Wood šo o dutše mo felotsoko, morekiši wa ka wa dipuku.

¹⁷⁵ Leo, Gene, bašemane ba babedi šeba, yo motee Mokatoliki, gomme yo mongwe ga ke nagane ke wa e ka ba efe. Ge ba etla Hammond, Indiana, gomme ba bone Moya wo Mokgethwa, ka go bona batho ba dikete, o bitša ntle, mengwaga e sego mekae ya go feta. Yo motee wa bona o godišište maledu a magolo bogolo. Ba ipopile bonabeng F.B.I. ya bona beng, go tla tlase le go bona ge tšona dilo e be e le nnete. Ba ttile godimo ntlong ya ka, ba itira baebangedi, le go ya pele. Gomme Moya wo Mokgethwa o ile tlase thwi le go e bitša ntle. Šeba bona, ba dutše mo bjale. Le a bona?

Gobaneng le sa kgone go O emela? Bothata ke eng?

¹⁷⁶ Mna. Wood, o mo felotsoko, o be a mpotša, o dutše thwi mo. Tlasetlase ka Louisiana, Ke mmone a gobetše. Ke mo leleditše mogala, le go mmotša go hlokomela. Letšatši la go latela, o ripile mogogorupo wa gagwe. A ka be a ripile letsogo la gagwe; Moya wo Mokgethwa. Mašego a se makae a go feta, ge ke be ke le ka Chicago, ke mmone a le ka gare ga muši, gomme ke mmoditše go ntšha mahlo dinameng. O be a tla ba le mpholo wa morodi thwi fale. Gomme o ile ka go mokgobo wola wa muši, gomme o nyakile go hwa thwi fale.

¹⁷⁷ Botšišang ka fao dilo di bolelewagopele, dibeke ka morago ga dibeke, le dikgwedi ka morago ga dikgwedi, pele di ka tsoge tša direga.

¹⁷⁸ Moragorago, beke, ke tla le bontšha se se se lego. Ye ke tumelo ya gago mong; gomme ke ka baka leo dilo di sa kgonego go direga. Ke lena le gogago go tloga go Moya wo Mokgethwa. Mo... Jesu ga se a tsoge a bona pono bakeng sa mosadi. E bile tumelo ya gagwe ye e Mo kgwathilego. Ke ka baka leo A fokotšego. Ke tumelo ya gago e se dirago, e sego ya ka. Ke wena o se dirago. Gomme ge o tloša wona maikutlo a go poka go tloga go wena, gomme wa dumela Modimo ka kgonthe, selo se se tla phatloga ntle go haleluya tsošeletšo ye nngwe ye kgolo gagolo, gomme dihlotša, difofu, digole, le se sengwe le se sengwe se tla direga. Eupša feela ge o dula o alameditšwe, A ka kgona go e dira bjang?

¹⁷⁹ Ke dumela go beng moloti. Eupša, e sego feela seo, selo seo sa boganaphetogo se go fa moya wa tumelokhwele. Se mpotše. Ke eme mo bjale. Ke tseba se ke bolelago ka sona. Moya wo Mokgethwa o thwi ka moagong wo, gonabjale, o tla fodiša yo mongwe le yo mongwe wa lena thwi mo le dutšego, ge le ka no e dumela. O šetše a e dirile. Ke ba bakae ba dumelago seo? [Phuthego e re, “Amene.”—Mor.] A le a e dumela? [“Amene.”] Go lokile.

Ke tla bona le dumela bontši gakaakang.

¹⁸⁰ Inamišang dihlogo tša lena nakwana feela. Bea seatla sa gago godimo ga yo mongwe kgauswi le wena. Bjale e no ya kgole le tumelokhwele ya gago. O ka fase ga pušo ya Kriste. “Kae kapa kae ba babedi goba ba bararo ba kgobokanego Leineng la Ka, ke tla ba magareng ga bona.”

¹⁸¹ Le ka no mpitša moikaketši, eupša le tla hwetsa mo motsotsong. Ke bona batho gonabjale ba fodišwa, yeo ke nnete, gonabjale. O ka no se e lemoge gonabjale. Eupša ge badiša ka moagong wo ba sa bone batho ba etla go bona morago ga ge ke sepešte, ba ba botša gore bothata bjola bja mogodu le dilo boka tšebo ba tlogetše, ke nna hlatse ya maaka. Yeo ke nnete. Yeo ke nnete. Ke e šeditše bjale, ka go lefase le lengwe.

¹⁸² Le a dumela. Le a dumela. Nnete, ge Mokgothu wa go se tsebe selo wa go šokiša ka Afrika, yo ebile a sa tsebego seatla se setona goba se setshadi ke sefe, a kgona go O amogela, go ka reng ka wena o kgonago go bala Beibele gomme o rutilwe ka Bokriste? Ge moisa wa go šokiša a swanetše go dumela, nako e tee feela a O lebeletše, gobane ke swanetše go ya felotsoko gape letšatši la go latela, gomme dikete di phagamile ka ditulong tša bogolofadi, le digole le difofu, gomme go reng ka wena?

¹⁸³ O Modimo, O kgaogelo bjang, “O pelotelele bjang, go se rate gore e ka ba mang a lahlege.”

¹⁸⁴ Bjale dula, kgauswi le Modimo. Ipolele sebe sa gago. Ipolele gosedumele ga gago. Botša Modimo gore o dihlong ka wenamong, ka gosedumele ga gago. Ke go hlohla o dire seo, gomme o tla bona letago la Modimo.

¹⁸⁵ Ke ikwela go tlotšwa gonabjale go dira se sengwe sa go fapana go feta nkile ka se dira. Ga se ka tsoge ka dira se, ka bophelong bja ka, eupša ke ikwela ke hlahliwe go se dira gonabjale.

¹⁸⁶ Ipolele sebe sa gago gonabjale. O re, “Gabotse, ke Mokriste.” Ipolele gosedumele ga gago. Botša Kriste gore o ka se tsoge wa se Mo dumele gape. Gonabjale o a Mo amogela. Gonabjale go ya go fela. Ga o sa ya go tsoge wa belaela ka yona, gape. Ga go kgathale go lebega bjang, go kwala bjang, o ya go Le dumela, gobane Modimo o boletše bjalo. Modimo o boletše bjalo.

¹⁸⁷ O tšwele ka toreng ya Babilonia. O tlide ka moedding mo Lili ya Moeding e lego gona. O tlide thabeng, Tsione, moo mogau wa Modimo o elelago ka tokologo go tšwa Mothopong wa Bophelo.

¹⁸⁸ Ipolele diphosho tša gago. E re, “Modimo . . .” Ge o dirile e ka ba eng go yo mongwe, e re, “Ke tla ya morago gomme ka e lokiša.” Dirang seo bjale.

¹⁸⁹ Ke nyaka yo mongwe le yo mongwe wa lena bjale, ge ke bolela thapelo ye, ke le nyaka le e rapele. Le e bolele ntle kudu, le nna. Ke no ya go e bolela, eupša o e rapele go tšwa pelong ya gago, ka hlogo ya gago e inamišitšwe, mahlo a tswaletšwe, yo mongwe le yo mongwe. O se phagamiše hlogo ya gago go fihla ke bolela bjalo. Ke nno lebelela go bona se nka kgonago go se bona. Bolela ye, morago ga ka.

¹⁹⁰ Ramaatlakamoka Modimo, [Phuthego e re, “Ramaatlakamoka Modimo,”] Mohlodi wa magodimo le lefase, [“Mohlodi wa magodimo le lefase,”] Mothomi wa Bophelo bjo bosafelego, [“Mothomi wa Bophelo bjo bosafelego,”] Mofi wa mpho ye nngwe le ye nngwe ye botse, [“Mofi wa mpho ye nngwe le ye nngwe ye botse,”] eba le kgaogelo go nna, O Modimo. [“eba le kgaogelo go nna, O Modimo.”] Swarela gosedumele ga ka. [“Swarela gosedumele ga ka.”] Ke dumela Ebangedi. [“Ke dumela Ebangedi.”] Ke dumela gore O mo. [“Ke dumela gore O mo.”] Ke a dumela gore bjale O diragatša Lentšu la Gago [“Ke a dumela gore bjale O diragatša Lentšu la Gago”] ka mmeleng wa ka. [“ka mmeleng wa ka.”] Bula ditšhanele. [“Bula ditšhanele.”] Ke kgothola gosedumele ga ka. [“Ke kgothola gosedumele ga ka.”] Ke amogela Moya wa Gago. [“Ke amogela Moya wa Gago.”] Ke a dumela gore O ka go nna bjale. [“Ke a dumela gore O ka go nna bjale.”] Ke a dumela bolwetši bja ka bo tla nyamalala. [“Ke a dumela bolwetši bja ka bo tla nyamalala.”] Lehu le bophelo di ka kgonna bjang [“Lehu le bophelo di ka kgonna bjang”] go phela ka mmeleng wa ka [“go phela ka mmeleng wa ka”] ge O le ka fao? [“ge O le ka fao?”] Ke a Go dumela. [“Ke a Go dumela.”] Gomme ke a Go amogela bjale [“Gomme ke a Go amogela bjale”] bjalo ka Mofodiši wa ka. [“bjalo ka Mofodiši wa ka.”—Mor.]

Bjale swara hlogo ya gago e inamišitšwe.

¹⁹¹ Yeo ke thapelo ya gago. Yeo ke thapelo ya gago. Bjale ke ya go go rapelela. Tšwelapele o tswaleletše ka gare. Tšwelapele o tswaleletše ka gare le Modimo. O se tsenye selo gape go monagano wa gago bjale. O thwi le wena, thwi fao kgauswi le lehlakore la gago. O re, "Ke nyaka Moya wo Mokgethwa, Ngwanešu Branham." Go lokile. O thwi fao go O fa. O re, "Ke nyaka phodišo ka mahlong a ka, Ngwanešu Branham." O thwi fao go e fa. "Ke nyaka lesea le fodišwa." O thwi fao go e dira. "Ke nyaka ngwanešu wa ka, mme wa ka." O thwi fao go e dira, thwi fao. Jehofa-jireh, Sehlabelo se se filwego!

¹⁹² Bjale ke ya go le rapelela. Beibele e rile, "Thapelo ya tumelo e tla phološa molwetši. Modimo o tla ba tsošetša godimo." Ge ke hweditše mogau sefahlegong sa gago, ka mošomo wa Moya wo Mokgethwa, ke tla rapela ka pelo yohle ya ka gonabjale gore Moya wo Mokgethwa o tla go hlatsetša gore mošomo o fedile.

¹⁹³ O Modimo, Tate wa ka, ke tla go la Jesu Leina, go rapelela batho ba bao ka go botega le tlhokofalo ba ipoletšego diphošo tša bona. O mošegofatšwa Modimo, anke bjo e be bošego bjo ba ka se tsogego ba bo lebetše. Anke Moya wo Mokgethwa o tle ka go pelo ye nngwe le ye nngwe feela bjale gomme o no ntšhetša tšohle ntle, se sengwe le se sengwe, le bolwetši bjhohle go tšwa mmeleng wa bona.

Bjale ke hlohladiabolo go ngangišanong.

¹⁹⁴ Sathane, o a lemoga gore o hwipintšwe. Ga o na le ditokelo tša semolao. Jesu Kriste, Morena wa ka, o go amogile maatlataolo a mangwe le a mangwe o bego o na le wona, ge A be a ehwa mo Khalibari go tloša sebe le bolwetši. Gomme ga o selo eupša mofori, gomme re bitša go fora ga gago. O tseba gore ge Morena wa rena a tlie mohlareng, O rogakile mohlare. Letšatši la go latela ke ge o ponne. Gomme Morena wa rena o rile go barutiwa ba Gagwe, "Ebang le tumelo ka go Modimo. Gobane ge le ka re, le tla re go thaba ye, 'Šuthišwa,' wa se belaele ka pelong ya gago, eupša wa dumela se o se boletšego se ya go direga, o ka ba le se o se boletšego."

¹⁹⁵ Sathane, o tseba Lengwalo ka seo. Gomme ke sa tšo ruta batho ba, gore, Modimo o ka go bona. Gomme ge Modimo a le ka go bona, gomme ba bolela go bolwetši bjola gomme ba re, "Tloga go nna," gomme ga ba belaele ka pelong ya bona, thwi nako yeo bolwetši bjola bo swanetše go tloga, gobane Kriste o boletše bjalo. Gobane, ga se bona ba ba boleLAGO. Ke Tate yo a dulago ka go bona, yo a boleLAGO. Ba na le tlhoko. Kafao, tšwela ka ntle ga bona, Leineng la Jesu Kriste. Ke a bolela, bjalo ka mohlanka wa Modimo, ka Molaetša go tšwa go Morongwa Yo a tloditšego le go netefatša go batho gore Jesu o mo gomme Molaetša ke nnete. Kafao, tšwela ka ntle ga bona, Leineng la Jesu Kriste. Ke go laela go tlogela motho yo mongwe le yo mongwe a babjago gomme o ye ka leswiswing la ntentle, Leineng la Morena Jesu Kriste.

[Mororo wa Moya wo Mokgethwa o a kwewa—Mor.]

¹⁹⁶ A le kwele Woo? [Phuthego e re, “Amene.”—Mor.] Ke na le nnete le kwele Woo. Ke ba bakae ba kwelego Mororo wo mogolo wola o ilego go kgabola moago feela nako yela? E be e le Wona. Ka nnete le ka se belaеe gape. Yoo e be e le Modimo, a bolela morago. A ga le kgone go bona? [Phuthego e a hlalala.]

¹⁹⁷ Phagamang. A le a dumela le fodišitšwe? [Phuthego e re, “Amene.”—Mor.] Le a dumela gore Modimo o arabile thapelo? Phagamišetšang diatla tša lena go Yena. Mo lebogeng bakeng sa yona. [Phuthego e a hlalala.] Go fedile. O fodišitšwe.

¹⁹⁸ Jesu o rile, “Ge o ka bolela.” Ke eng? Ge o tšwele ka Babilonia, o le ka ntle go tšwa go go gosedumele. O ka ntle go tšwa ka fase ga ditumelokhwele. O ka ntle go tšwa ka fase ga dilo tšohle tše. Gomme o tladišwe ka Bophelo bja Modimo Mong. Segalontšu sa gago ke Segalontšu sa Gagwe. Ke wena.

¹⁹⁹ Ke e boletše. Ka kamoreng ya ka, lebakana la go feta, Modimo o mpoditše go dira se. Gomme šo Wona. O e netefaditše gonabjale. [Phuthego e re, “Amene.”—Mor.] Amene. Gomme Leina la Morena le šegofatšwe. Oo, a nako! Ke lekga la mathomo se se direga ge e sa le Afrika Borwa. Le tla phiphila ka gosedumeleng botelle gakaakang? Le hwetša seo? Phefo e swietše go kgabola sefala mo gonabjale, ge Moya wo Mokgethwa o be o kgabaganyetša ka mošono mo, gobane e bile Lentšu le le boletšwego la Modimo le e dirilego. Amene.

²⁰⁰ Ke ba bakae ba lena ba fodišitšwego? Phagamišang diatla tša lena. Ke ba bakae ba kwago go fapania ka mmeleng wa gago? Phagamiša seatla sa gago. [Phuthego e re, “Amene.”—Mor.] Šeo yona. Bjale le fodišitšwe ke letago la Modimo. Bohle ba kwago go fapania, ge o ka kgona go sepediša letsogo la gago, le sepediše. Ge o kgona go kwa ka tsebe ya gago, hloma monwana wa gago ka tsebeng gomme o theetše. O kgona go kwa. Ge o be o sa kgone go sepela, ema ka maoto a gago. Ge o le sefou, tloša meriti ya gago mahlong a gago. O kgona go bona.

²⁰¹ Moya wo Mokgethwa o fetile go kgabola lefelo le gonabjale ka tiišetšo ya Lentšu. Haleluya! A go šegofatšwe Leina la Morena. Moswanalephefo o ile bokagodimo bja moago. Ke ba bakae ba kgonnego go kwa Woo ge O ile go kgabola mo? Phagamiša seatla sa gago. Botegela wenamong. Phefo yela ye e fetilego go kgabola moago ke Moya wo Mokgethwa. [Phuthego e re, “Amene.”—Mor.] “E bolele, e tla dirwa.” Boka Phefo ye kgolo ya go ratega e ile “fše,” thwi go theoga go kgabaganya mo, gomme ke E kwele ge E be e kgabaganya ka godimo ga batheeletši. Le E kwele le go ikwela Yona, le lena. Ke Bogona bja Gagwe.

²⁰² Bohle bjale ba ba kwago go fapania, bohle bjale ba ba kwago gore le fodile, bohle bjale ba ba kwago gore Kriste o ka go lena!

²⁰³ E be e le eng Yeo? Feela boka Moya wo Mokgethwa o etla ka Letšatši la Pentecost, go tlie thwi fase, Phefo ye e

swietšego ka godimo mo. Ke ba bakae e lego hlatse ya Wona? Phagamiša seatla sa gago. Yo mongwe le yo mongwe, go botega go tšwa pelong ya gago. Sole wona. O swietše go kgabola moago gonabjale. Ke Moya wo Mokgethwa wa go swana. [Phuthego e re, "Amene."—Mor.] Moya wo Mokgethwa wa go swana o tla ka Lentšu la go swana. A go šegofatšwe Leina la Morena. Amene.

²⁰⁴ Bohle ba ba dumelago gore le fodištšwe, emang ka maoto a lena. Yo mongwe le yo mongwe a dumelago gore o ikwela go fapania, ya, gore o fodile gonabjale, ema ka maoto a gago. [Phuthego e a hlalala—Mor.] Amene. Amene. Yeo ke yona. Amene. Ge ba sa letile, ge le thoma go ikwela go fapania! Ge o be o ne hlogo ya go opa, ge go sepetše, ema. Ge o be o babja ka mogodung wa gago, ema, ge go sepetše. Ema bjalo ka hlatse. Ke lena bao. E dira eng? Ke Moya wo Mokgethwa o e dirilego. Amene. O tladitšwe ka bobotse bja Gagwe! Oo, nna!

²⁰⁵ "Ye ke kanegelo ya ka, ye ke pina ya ka." Oo, a ga le ikwele gabotse? [Phuthego e re, "Amene."—Mor.]

...gelo, ye ke pina ya ka (Yo mongwe le yo mongwe.),
Go tumiša Mophološi wa ka letšatši lohle botelele;
Ye ke kanegelo ya ka, oo, ye ke pina ya ka,
Go tumiša Mophološi wa ka letšatši lohle botelele.

A re e opeleng gape, yo mongwe le yo mongwe. E tope.

Ye ke kanegelo ya ka, oo, ye ke pina ya ka. (Yo mongwe le yo mongwe.),
Go tumiša Mophološi wa ka letšatši lohle botelele;
Ye ke kanegelo ya ka, oo, ye ke pina ya ka,
Go tumiša Mophološi wa ka lohle...

²⁰⁶ Go kwagala bjang go fodišwa? Šišinyang diatla tša lena go Yena, go kwagala bjang go fodišwa. E no lebelela kua. Mpotseng a diabolo ga a fenngwe? Nnete, o dirile. Amene. [Phuthego e a hlalala—Mor.]

²⁰⁷ Yena o a makatša. Oo, nna! Re fe tšhune ya, "Semaka, semaka, Jesu ke sona go nna." Ke ba bakae ba tsebago pina yeo?

Semaka, semaka, Jesu ke sona go nna,
Moeletši, Mokgoma wa Khutšo, Modimo Ramaatla.

Go lokile. O a e tseba, kgaetšedi? Go lokile.

Semaka, semaka, Je-...
Moeletši, Kgoši ya Khutšo, Modimo Ramaatla
ke Yena;

Oo, go mphološa, go mpoloka go tloga go sebe
sohle le hlong,
Semaka, Molopodi wa ka, tumišang Leina la
Gagwe!

Oo, semaka, semaka, Jesu ke sona go nna,
Oo, Moeletši, Mokgoma wa Khutšo, Modimo
Ramaatla ke Yena;
Oo, go mphološa, go mpoloka go tloga go sebe
sohle le hlong,
Semaka ke Molopolodi wa ka, tumišang . . .

²⁰⁸ Go hola, ge go na le mmelaedi a emego kgauswi, yeo, ke e kwago ka pelong ya ka bjale gomme kgahlanong le Moya wa ka. Yo mongwe o nagana gore Mororo wola o ilego go kgabola nakwana ya go feta o hlotšwe ke sefofane goba se sengwe.

²⁰⁹ Modimo, Yo e lego Moahlodi wa go botega wa ka, Moya wola o tlie go kgabaganya sefala se, e bile o phepheutše jase ya ka ka lehlakoreng, gomme wa Rorela ntle bokagodimo ga moago thwi kua. Ke O kwele, ke O bone, ge O be o eya ka ntle. Ke ba bakae e lego hlatse bjale? Beibele e rile, “Molomo wa dihlatse tše pedi goba tše tharo.” [Phuthego e re, “Amene.”—Mor.] Ka go phethagala ga se . . . Ke Moya wo Mokgethwa.

²¹⁰ Le elelwa ge Jesu a be a rapela, nako ye nngwe, gomme go bille Mororo go tšwa Legodimong? Ke ba bakae ba elelwago seo? [Phuthego e re, “Amene.”—Mor.] Gomme ba bangwe ba bona ba rile, oo, se sengwe, “e dumile” goba sengwe boka seo. Seo se sa ntše. Moya wa go sola o sa ntše o phela.

²¹¹ Eupša, Modimo o sa ntše a phela, le yena. O thwi mo. Phefo ye maatla ya go kitima ya go swana ye e tliego fase go tšwa Legodimong ka Letšatši la Pentecost e thwi mo go hlatsela selo sela sa go swana gape. Modimo Ramaatlakamoka ke Moahlodi wa dilo tšohle. Amene.

²¹² A le a Mo rata? [Phuthego e re, “Amene.”—Mor.] Tumišang Morena. Go lokile. Yo mongwe le yo mongwe oboletsä gomme o šikinye diatla le seng sa lena ge re sa opela *Semaka* gape. Lena Mamethodist le Mabaptist dirang bjale. Go lokile.

Semaka, . . .

Oo, retologa thwi go dikologa, šikinya diatla le yo mongwe le yo mongwe go dikologa.

. . . nna,
Moeletši, Mokgoma wa Khutšo, Modimo
Ramaatla ke Yena;
Oo, go mphološa, go mpoloka go tloga go sebe
sohle le hlong;
Oo, semaka ke Molopolodi wa ka, tumišang
Leina la Gagwe!

²¹³ Tumišang Morena. A le ikwa gabotse bjale? Gohlegohle, dipelaelo tšohle di sepetše? Šikinyang diatla tša lena go Yena. “Yohle e ile. Dipelaelo tšohle di ile.” Oo, nna! Semaka! Semaka! Gabotse! “Dipelaelo tšohle di ile.”

Modimo a go šegofatše, Ngak. Vayle.



BOTEE BJA KOPANO NST58-0128
(The Oneness Of Unity)

Molaetša wo ka Ngwanešu William Marrion Branham, setlogong o abilwe ka Seisimane ka Labobedi mantšiboa, Janaware 28, 1958, ka The Hippodrome ka Waterloo, Iowa, U.S.A., o tšerwe go tšwa go theipi ya go gatišwa ya makenete gomme o ngwadilwe ntle le go fokotšwa ka Seisimane. Ye ya North Sotho phetolelo e ngwadilwe gomme ya phatlalatšwa ke Voice Of God Recordings.

NORTH SOTHO

©2021 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriſte. Puku ye e ka se kgone go rekišwa, go tſweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditſhelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org